

ՏԵՂԵԿԱՆՔ

«Հայաստանի Հանրապետության կառավարության և Եգիպտոսի Արաբական
Հանրապետության կառավարության միջև պաշտպանության բնագավառում
համագործակցության մասին» համաձայնագրի կնքման նպատակահարմարության
մասին

Կահիրեում Հայաստանի Հանրապետության դեսպանի և Եգիպտոսի Արաբական
Հանրապետության ԱԳՆ Արնեյյան Եվրոպայի վարչության պետի կայացած
հանդիպմանը Հայաստանի Հանրապետության և Եգիպտոսի Արաբական
Հանրապետության միջև պաշտպանության բնագավառում համագործակցության
հարցերը քննարկելիս եգիպտական Կոդմը խնդրել է ՀՀ պաշտպանության
նախարարությանը ներկայացնել համաձայնագրի նախագիծ (ՀՀ ԱԳՆ-ից 30.03.2010թ.
ստացված N13/04455 գրություն), որն ուսումնասիրելուց հետո Եգիպտոսի Արաբական
Հանրապետության պաշտպանության նախարարությունը կներկայացնի իր կարծիքը և
առաջարկները համապատասխան գործընթաց սկսելու համար: Ղեկավարվելով
“Հայաստանի Հանրապետության միջազգային պայմանագրերի մասին” ՀՀ օրենքի 9-րդ
հոդվածով՝ Հայաստանի Հանրապետության պաշտպանության նախարարությունը
մշակել է «Հայաստանի Հանրապետության կառավարության և Եգիպտոսի Արաբական
Հանրապետության կառավարության միջև պաշտպանության բնագավառում
համագործակցության մասին» համաձայնագրի նախագիծ: Վերոնշյալ Համաձայնագրով
նախատեսվում է Հայաստանի Հանրապետության կառավարության և Եգիպտոսի
Արաբական Հանրապետության կառավարության միջև պաշտպանության ոլորտի
հետևյալ հարցերի շուրջ համագործակցություն. պաշտպանական պլանավորում,
քաղաքացիական վերահսկողություն զինված ուժերում, միջազգային կայունացման
գործողություններ, միջազգային անվտանգության պարտավորություններ, պետության
պաշտպանության և անվտանգության ոլորտներում փոխհարաբերությունների
իրավական կարգավորում, ռազմական իրավագիտություն, զինված ուժերում
ծառայության իրավական կարգավորում, զինված ուժերում անձնակազմի կառավարում,
սոցիալական ապահովության համակարգ, ռազմական արդյունաբերություն և
սպառազինությունների ծրագրեր, ռազմական կրթություն, վերապատրաստում և
վարժանք, թիկունքային ապահովում, ռազմական բժշկություն, հատուկ նշանակության
գործերի վարժանքներ, ռազմական ավիացիա, ռազմական տեղագրություն, հրետանի և
հակաօդային պաշտպանություն, ինժեներական ծառայություն, ռադիո-էլեկտրոնային
պայքար, ռազմագիտություն և հետազոտություններ, մշակութային և սպորտային
միջոցառումներ, ճգնաժամերի կառավարում, շրջակա միջավայրի պահպանություն և
բնական, էկոլոգիական ու արդյունաբերական աղետների վթարների և դրանց
հետևանքների վերացման կառավարում զինված ուժերի լիազորությունների

շրջանակներում: Համաձայնագրի նախագծով նախատեսվում է, որ Կողմերը փոխադարձ համաձայնությամբ կարող են համագործակցել նաև այլ ուղղություններով: Փաստաթղթով սահմանված են համագործակցության իրականացման ձևերը: Նախատեսվում է, որ Կողմերը համագործակցության իրականացման համար նշանակում են լիազորված մարմիններ (ՀՀ կողմից՝ ՀՀ պաշտպանության նախարարությունը, ԵԱՀ կողմից՝ ԵԱՀ պաշտպանության նախարարությունը), ինչպես նաև նախատեսված են Կողմերի ֆինանսական պարտավորությունները: Համաձայնագրի նախագծով սահմանված է, որ այն կնքվում է անորոշ ժամկետով:

Հաշվի առնելով այն հանգամանքը, որ Եգիպտոսի Արաբական Հանրապետությունում գործում է հայկական մեծ համայնք, Եգիպտոսի Արաբական Հանրապետության Զինված Ուժերը համալրված են նաև նախկին խորհրդային միության սպառազինությամբ և ռազմական տեխնիկայով, ինչպես նաև նպատակ հետապնդելով Եգիպտոսի Արաբական Հանրապետության հետ սկսել պաշտպանության բնագավառում սերտ համագործակցություն և «Հայաստանի Հանրապետության միջազգային պայմանագրերի մասին» ՀՀ օրենքի 9-րդ հոդվածի 1-ին մասի չորրորդ պարբերությանը համապատասխան, Հայաստանի Հանրապետության պաշտպանության նախարարությունը նպատակահարմար է գտնում «Հայաստանի Հանրապետության կառավարության և Եգիպտոսի Արաբական Հանրապետության կառավարության միջև պաշտպանության բնագավառում համագործակցության մասին» համաձայնագրի կնքումը:

ՀՀ պաշտպանության նախարար



Ս. ՕՇԱՆՅԱՆ